

UCAPAN YAB PERDANA MENTERI, MERANGKAP MENTERI PERTAHANAN DI MAJLIS JAMUAN MAKAN MALAM PERPISAHAN UNTUK KETUA TURUS ANGGKATAN TENTERA, JENERAL TAN SRI DATO' HAJI MOHD. SANY BIN ABDUL GHAFAR, DI HOTEL EQUATORIAL, KUALA LUMPUR PADA 12HB JANUARI, 1981

Yang Berhormat Timbalan Menteri Pertahanan¹, dan Isteri, Yang Berbahagia Jeneral Tan Sri Dato' Haji Mohd. Sany² dan Puan Sri, Yang Berbahagia Ketua Setiausaha Kementerian Pertahanan³, Tuan-tuan dan Puan-puan sekalian.

Saya amat sukacita, kerana dapat bersama-sama di Majlis pada malam ini, untuk meraikan Yang Berbahagia Jeneral Tan Sri Dato' Haji Mohd. Sany yang akan bersara pada 19 haribulan, bulan ini. Majlis ini, juga memberi peluang kepada saya, untuk berkenalan dengan pegawai-pegawai awam dan tentera yang hadir pada malam ini.

Tuan-tuan dan puan-puan,

Jeneral Tan Sri Sany adalah seorang pegawai tentera yang berkelebar, dan penuh kematangan, di dalam bidang ketenteraan. Beliau telah memimpin Angkatan Tentera kita dengan penoh disiplin, didikasi dan cemerlang. Persaraan Jeneral Tan Sri Sany, merupakan satu kehilangan yang besar kepada Angkatan Tentera.

Jeneral Tan Sri Sany dilahirkan pada 19hb. Januari, 1926. Beliau telah memulakan perkhidmatannya dengan Angkatan Tentera 19hb. September, 1949, dan telah ditauliahkan pada 8hb. Februari 1952. Jeneral Tan Sri Sany telah memegang berbagai jawatan, di dalam beberapa bahagian Angkatan Tentera. Beliau juga telah menghadiri berbagai kursus di Seberang Laut, termasuklah di

¹En. Abu Hassan bin Haji Omar.

²Ketua Turus Angkatan Tentera.

³Dato' Mohd. Yusof bin Abdul Rahman.

Joint Services Staff College, di England, pada bulan Ogos, 1963. Jeneral Tan Sri Sany dilantik sebagai Ketua Turus Tentera Darat pada 1hb. Julai, 1975. Pada 1hb Disember, 1977, beliau telah dilantik sebagai Ketua Turus Angkatan Tentera. Selain daripada memegang jawatan-jawatan di dalam Angkatan Tentera, Jeneral Tan Sri Sany juga pernah berkhidmat sebagai Duta Besar Malaysia ke negeri Belanda.

Jeneral Tan Sri Sany dihormati oleh semua anggota Angkatan Bersenjata. Di bawah pimpinannya yang jujur dan didikasi, Angkatan Bersenjata kita telah terus mencapai kejayaan yang diharapkan. Pengalaman Jeneral Tan Sri Sany yang luas setelah memegang berbagai jawatan, telah membolehkan beliau menjalankan tanggungjawab sebagai Ketua Turus Angkatan Tentera, dengan berkesan.

Angkatan Bersenjata kita terdiri daripada tiga Bahagian, iaitu Tentera Darat, Tentera Udara dan Tentera Laut. Di dalam menunaikan tanggungjawabnya, penyelarasan dan kerjasama yang erat diantara ketiga-tiganya, adalah penting. Kerjasama seperti ini juga, adalah perlu di dalam perhubungannya dengan perkhidmatan-perkhidmatan yang lain. Jeneral Tan Sri Sany telah berusaha dengan giatnya untuk mengukuhkan kerjasama ini.

Tuan-tuan dan Puan-puan sekalian,

Peranan dan tanggungjawab Angkatan Bersenjata di dalam sesebuah negara yang membangun, adalah amat penting. Pembangunan negara memerlukan keadaan keselamatan yang terjamin, dan suasana politik yang stabil. Walau pun keadaan politik di negara kita adalah stabil, dan keselamatannya terkawal, tetapi perkembangan-perkembangan di peringkat antarabangsa dan serantau, boleh menimbulkan masalah kepada negara kita.

Perkembangan politik serantau masih menjadi kebimbangan kita. Itulah sebabnya kita, bersama-sama rakan-rakan kita di dalam ASEAN, berpegang tegoh kepada hasrat, dan berusaha untuk membawa kenyataan kepada konsep menjadikan rantau Asia Tenggara sebagai satu kawasan aman, bebas dan berkecuali.

Kestabilan dan keselamatan di rantau ini, akan menjamin kejayaan usaha-usaha kita untuk membangunkan negara, dan membawa kemakmuran kepada rakyat.

Tuan-tuan dan Puan-puan sekalian,

Usaha-usaha untuk memesatkan pembangunan negara, akan diteruskan. Di samping itu, memandangkan kepada pentingnya faktor-faktor keselamatan dan pertahanan negara, usaha-usaha sedang ditingkatkan untuk memperbesar dan memodenkan Angkatan Bersenjata kita, sesuai dengan kemampuan negara. Sebagai sebuah negara yang membangun, dan dengan kemampuannya yang terhad, tanggungjawab mempertahankan negara, merupakan satu bebanan yang berat bagi Angkatan Bersenjata kita. Memandangkan kepada tanggungjawab yang berat inilah, maka rakyat haruslah bersama-sama memikul bebanan ini.

Kemampuan Angkatan Bersenjata, tidak terletak hanya kepada bilangan anggota, senjata dan alat kelengkapannya, tetapi apa yang lebih penting, ialah semangat dan disiplin anggota-anggotanya, untuk menghadapi apa-apa jua cabaran dan dalam apa-apa jua keadaan. Saya merasa bangga di atas semangat dan kemampuan Angkatan Bersenjata kita. Walau bagaimana pun, kita tidak harus berhenti daripada berusaha untuk meningkatkan lagi kemampuan ini. Saya harap, setiap anggota Angkatan Bersenjata, akan terus berusaha untuk mengekal dan meninggikan lagi taraf professionalisma dan disiplinnya, sesuai dengan peranan dan tanggungjawabnya yang penting dan berat itu.

Tuan-tuan dan Puan-puan sekalian,

Saya juga mengambil kesempatan untuk mengucapkan tahniah kepada Jeneral Tan Sri Ghazali bin Dato Seth, yang akan memegang jawatan Ketua Turus Angkatan Tentera nanti. Saya harap, semua anggota Angkatan Bersenjata akan terus memberi sokongan dan kerjasama penuh beliau, di dalam menunaikan tanggungjawabnya.

Akhirnya, saya hendak merakamkan setinggi-tinggi penghargaan kepada Jeneral Tan Sri Sany, di atas perkhidmatan cemerlang dan sumbangan baktinya kepada Angkatan Tentera dan negara. Saya berdoa semoga beliau dan Puan Sri senantiasa berada di dalam sehat wa'afiat dan selamat sejahtera.



YAB Dato' Hussein Onn semasa berucap di Majlis Jamuan Makan Malam Perpisahan untuk Ketua Turus Angkatan Tentera, Jeneral Tan Sri Dato' Haji Mohd. Sany bin Abdul Ghafar, di Hotel Equatorial, Kuala Lumpur pada 12hb Januari, 1981.